

"Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" ғарыш айлағынан зымырандарды жіберу кезінде авариялар болған жағдайдағы өзара іс-қимылдың тәртібі туралы келісімді бекіту туралы" Қазақстан Республикасы Заңының жобасы туралы

Қазақстан Республикасы Үкіметінің 2004 жылғы 25 желтоқсандағы N 1388 Қаулысы

Қазақстан Республикасының Үкіметі **ҚАУЛЫ ЕТЕДІ:**

1. "Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" ғарыш айлағынан зымырандарды жіберу кезінде авариялар болған жағдайдағы өзара іс-қимылдың тәртібі туралы келісімді бекіту туралы" Қазақстан Республикасы Заңының жобасы Қазақстан Республикасының Парламенті Мәжілісінің **қарауына** **енгізілсін.**

2. Осы қаулы қол қойылған күнінен бастап күшіне енеді.

Қ а з а қ с т а н Р е с п у б л и к а с ы н ы ң

Премьер-Министрі

Жоба

**ҚАЗАҚСТАН РЕСПУБЛИКАСЫНЫҢ
ЗАҢЫ Қазақстан Республикасының Үкіметі мен Ресей
Федерациясы Үкіметінің арасындағы "Байқоңыр" ғарыш
айлағынан зымырандарды жіберу кезінде авариялар болған
жағдайдағы өзара іс-қимыл тәртібі туралы
келісімді бекіту туралы**

1999 жылғы 18 қарашада Астана қаласында жасалған Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" ғарыш айлағынан зымырандарды жіберу кезінде авариялар болған жағдайдағы өзара іс-қимыл тәртібі туралы келісім бекітілсін.

Қ а з а қ с т а н Р е с п у б л и к а с ы н ы ң

Президенті

**Қазақстан Республикасының Үкіметі мен Ресей Федерациясы
Үкіметінің арасындағы "Байқоңыр" ғарыш айлағынан
зымырандарды жіберу кезінде апаттар болған**

жағдайдағы өзара іс-қимылдың тәртібі туралы

КЕЛІСІМ

Бұдан әрі Тараптар деп аталатын Қазақстан Республикасының Үкіметі мен Ресей Федерациясының Үкіметі,

Қазақстан Республикасы мен Ресей Федерациясының арасындағы "Байқоңыр" ғарыш айлағын пайдаланудың негізгі принциптері мен шарттары туралы 1994 жылғы 28 наурыздағы келісімді, 1994 жылғы 10 желтоқсандағы Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" кешенін жалға алу шартын, Қазақстан Республикасының Үкіметі мен Ресей Федерациясы Үкіметінің арасындағы өнеркәсіптік авариялардың, апаттардың табиғи бақытсыздықтардың алдын алу және олардың зардаптарын жою саласындағы ынтымақтастық туралы 1994 жылғы 28 наурыздағы келісімді, Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" кешенін Ресей Федерациясының жалға алуы жағдайында оның аумағындағы экология және табиғатты пайдалану жөніндегі 1997 жылғы 4 қазандағы келісімді басшылыққа ала отырып, "Байқоңыр" кешенін қауіпсіз пайдалануда өзара мүдделіліктерін білдіре отырып, мына төмендегілер туралы келісті:

1-бап

Осы Келісім Тараптардың "Байқоңыр" ғарыш айлағынан зымырандарды жіберу кезінде апаттар болған жағдайдағы міндеттерін, Тараптардың күштері мен құралдарын "Байқоңыр" ғарыш айлағынан зымырандарды жіберу сәтіне Тараптардың күші мен құралдарын дайындық жағдайына келтірудің тәртібін, зымырандарды жіберуге дайындығы туралы және апат жағдайында Тараптардың өзара хабарласу рәсімдерін, сондай-ақ апаттардың зардаптарын жою үшін Тараптардың қажетті күштері мен құралдарын тартудың тәртібін айқындайды.

Осы Келісімнің мақсаттары үшін:

- "зымыран" ғарыштық мақсаттағы кез келген зымыранды (ғарыштық аппаратты, екпіндеткіш блокты және басқа да құрамдас бөліктерді қоса алғанда) немесе жабдықтау элементтерімен бірге баллистикалық зымыранды білдіреді;

- "апат" зымыранның немесе оның бөлшектерінің Ресей Тарапы Қазақстан Тарапынан жалға алған аумақтың сыртындағы Қазақстан Республикасының аумағына құлауын білдіреді.

2-бап

Ресей Тарапы апаттардың зардаптарын жою үшін мынадай күштер мен құралдарды:

- "Байқоңыр" ғарыш айлағының объектілерінде апаттық жағдайларды жою және апаттық-құтқару жұмыстарын жүргізу үшін апаттық-құтқару отрядын;
- зымырандық-ғарыштық қызметтің табиғи ортаға әсерінің мониторингін және "Байқоңыр" кешені мен зымырандардың ұшу трассасы бойынша гигиеналық бақылау жүргізу үшін мамандандырылған зертханаларды;
- авиациялық-ғарыштық іздестіру және құтқару күштері мен құралдарын;
- мамандандырылған дәрігерлік-биологиялық жедел ден қою бригадаларын;
- апат жағдайларында табиғи ортаның ластануының мүмкін деңгейін жедел болжаудың мамандандырылған қызметтерін;
- апаттардың зардаптарын жою үшін аспаптар мен химиялық реактивтердің а з а й м а й т ы н қ о р ы н ;
- басқа да күштер мен құралдарды тарта алады.

3-бап

Қазақстан Тарапы апаттардың зардаптарын жою үшін мына күштер мен құралдарды :

- арнайы апаттық-құтқару және іздестіру-құтқару бөлімшелерін;
- өртке қарсы, санитарлық-эпидемиологиялық медициналық табиғатты қорғау және басқа да қызметтерді, сондай-ақ құқық қорғау органдарын;
- қажет болған жағдайда эвакуациялық іс-шараларды және апаттың аймағында қалған елді мекендерден эвакуацияланған адамдарды қабылдауды жүргізу кезінде уақытша баспанаға орналастыру және тамақтану орындарын ұйымдастыру үшін азық-түлік пен материалдық ресурстардың қорын;
- басқа күштер мен құралдарды тарта алады.

Қазақстан Тарапының апаттардың зардаптарын жою үшін тартылатын күштері мен құралдарының нақты құрамы Ресей Тарапының апаттардың болжамды ауданы, оның мүмкін болатын ауқымдары мен зардаптары, қажетті күштер мен құралдар туралы жедел ақпаратына сүйене отырып айқындалады.

4-бап

Ресей Тарапы апаттардың мүмкін болатын зардаптарына талдау жасауды қамтамасыз ету мақсатында Қазақстан Тарапына зымырандардың үлгілері, олардың ұшу трассасы және апат жағдайында құлауы мүмкін аудандар жөніндегі техникалық м ә л і м е т т е р д і ұ с ы н а д ы .

Ресей Тарапы Қазақстан Тарапының өтінімдеріне орай өзара уағдаластық бойынша Қазақстан Республикасының мамандарын апаттардың зардаптарын жою кезіндегі іс-қимылдарға үйретуді жүзеге асырады және Қазақстан Тарапына қажетті әдістемелік материалдарды береді.

5-бап

Ресей Тарапы апат болған жағдайда оның себептері анықталғанға дейін апатқа ұшыраған зымыран жататын зымырандардың түрін жіберуді тоқтатады, ол туралы Қазақстан Тарапын хабардар етеді.

Ресей Тарапы Қазақстан Тарапына апаттың себептері, зымыранның осы түрін бұдан былайғы жіберулерінің қауіпсіздігін қамтамасыз ету жөніндегі іс-шаралардың орындалуы туралы хабарлайды және Қазақстан Тарапының келісімі бойынша оларды жіберуді қайтадан бастайды.

6-бап

Қазақстан Тарапының апаттық-құтқару бөлімшелерін дайындық жағдайына уақытылы келтіруі мақсатында Ресей Тарапы келісілген тәртіпке сәйкес алда тұрған зымыранды жіберу туралы Қазақстан Тарапына хабарлайды. Зымыранның жіберілетін күні және/немесе уақыты ауыстырылған жағдайда, қайтадан ұшырылу уақыты белгіленген уақытқа дейін кем дегенде 24 сағат бұрын құлақтандыру жүргізіледі. Жіберу уақыты 24 сағаттан кем уақытқа ауыстырылған жағдайда, хабарлау жедел байланыс арналары арқылы кідіріссіз жүргізіледі.

Ресей Тарапы зымырандарды жіберуді жүзеге асыру кезінде қауіпсіздікті қамтамасыз ету үшін өтемақылық негізде Қазақстан Республикасының апаттық-құтқару бөлімшелерін тартады. Бұл бөлімшелерді тартудың тәртібі Тараптардың уәкілетті органдарының арасындағы тиісті келісімдермен айқындалады.

7-бап

Зымыранды жіберудің жоспарланған уақытына 8 сағат қалғанда Тараптардың уәкілетті органдары Тараптардың апаттық-құтқару бөлімшелерінің дайындығы туралы а қ п а р а т а л м а с а д ы .

Ресей Тарапының уәкілетті органдары апат болған жағдайда Қазақстан Тарапының уәкілетті органдарына болған жағдай туралы хабарлайды. Ақпараттарды өзара алмасудың тәртібі Тараптардың уәкілетті органдарының арасындағы келісімдермен айқындалады.

8-бап

Апат болған жағдайда Ресей Тарапының уәкілетті органдары дереу Ресей мамандарының жедел тобын құрады және оны апат болған сәттен бастап 12 сағаттан кешіктірместен жағдайды бағалау, Қазақстан Республикасының өкімет органдарымен өзара іс-қимылды ұйымдастыру және апаттың зардаптарын жою жөніндегі бірінші

кезектегі іс-шараларды орындау үшін апат ауданына жібереді.

Қажет болған жағдайда Ресей Тарапының уәкілетті органдары Қазақстан Тарапымен келісілген мерзімдерде апаттың зардаптарын жою үшін мамандар тобын құрады және оны апат аймағына жібереді.

Тараптар апаттың себептерін анықтау және зардаптарын бағалау жөніндегі үкіметтік комиссиялар құрады, олар апаттардың зардаптарын жою жөніндегі бірлескен штаб құрады және одан арғы бірлескен іс-қимылдардың тәртібін келіседі.

Үкіметтік комиссиялар жұмысының қорытындысы бойынша бірлескен хаттамаға қол қойылады.

9-бап

Тараптардың іздестіру-құтқару және апаттық-құтқару бөлімшелерінің, атап айтқанда, зымыранның бөлшектерін жинау, тұрғындарды медициналық тексеру, аумақты малдәрігерлік тексеру, қоршаған ортаның объектілерінен сынама іріктеу және талдау жөніндегі іс-қимылдарын қоса алғанда, жағдайды бағалау жөніндегі іс-қимылдары осы Келісімнің 8-бабында аталған үкіметтік комиссиялармен келісілген тәртіппен, көлемде және әдістемелер бойынша бірлесіп жүзеге асырылады. Апаттың зардаптарын бағалаудың қорытындысы бойынша аталған үкіметтік комиссиялардың уәкілетті өкілдері екі жақты актілерге қол қояды.

Апаттың салдарынан болған материалдық зиянның мөлшерін айқындауды Тараптар бірлесіп жүргізеді.

10-бап

Осы Келісімге сәйкес апаттың зардаптарын жою жөніндегі іс-шараларды жүргізуге және залалды өтеуге байланысты шығыстарды үкіметтік комиссиялар жұмысының қорытындысы бойынша, апаттың зардаптарын бағалаудың қол қойылған екі жақты актілерінің негізінде, келісілген көлемдерде Ресей Тарапы жүзеге асырады.

11-бап

Қазақстан Тарапы Ресей Тарапы өкілдерінің зымыранның бөлшектері құлаған жерлерге кедергісіз кіруін қамтамасыз етеді.

Апат жағдайында осы Келісімнің 8-бабына сәйкес құрылған бірлескен штаб зымыранның бөлшектерін жинауға арналған алаңның орналасатын орнын және оларды күзетуді белгілейді. Алаңға кіруді осы Келісімнің 8-бабында аталған ресейлік мамандардың жедел тобының мүшелері бақылайды.

Қазақстан Тарапы зымыранның Қазақстан Республикасының аумағында жиналған барлық бөлшектерін келісілген режимдік іс-шараларды қамтамасыз ете отырып Ресей

Тарапына дереу қайтаруды қамтамасыз етеді.

Зымыранның бөлшектерін іздестіру және жинау үшінші тараптың мүддесін қозғаған жағдайда, Ресей Тарапы Қазақстан Тарапымен кеңесе отырып олардың өкілдерін апат ауданындағы іс-шараларға тарта алады.

12-бап

Қазақстан Тарапы Ресей Тарапының өкілдері Қазақстан Республикасының аумағына кірген және аумағынан шыққан, апаттың зардаптарын жоюға арналған ресейлік жабдықтар мен материалдарды әкелу және әкету, сондай-ақ зымырандардың бөлшектерін апаттың себептерін анықтау үшін Ресей Федерациясының аумағына әкету кезінде 1994 жылғы 10 желтоқсандағы Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" кешенін жалға алу шартына сәйкес өндіріп алу кеден органдарының құзыретіне жататын кедендік баждар мен салықтарды алмастан оңайлатылған шекаралық және кедендік режимді қамтамасыз етеді.

Қазақстан Тарапы апаттың зардаптарын жоюға қатысатын Ресей Федерациясының әуе кемелеріне басымдық берілетін тәртіппен әуе дәліздері мен тұрақтар береді.

Қазақстан Тарапы Ресей Тарапының сұрауы бойынша апаттың зардаптарын жою үшін келген ресейлік мамандарды іс-жүзіндегі шығындарды Ресей Тарапының Қазақстан Республикасының мемлекеттік органдарының қызметкерлеріне белгіленген тәртіппен және мөлшерлерде кейін өтеуі арқылы көлікпен, баспанамен, тамақпен, байланыс құралдарымен қамтамасыз етеді.

13-бап

Осы Келісім бойынша жұмыстарды үйлестіруді:

Қазақстан Тарапынан - Қазақстан Республикасының Төтенше жағдайлар жөніндегі агенттігі мен Қазақстан Республикасының Энергетика, индустрия және сауда министрлігі;

Ресей Тарапынан - Ресей авиация-ғарыш агенттігі мен Ресей Федерациясының Қорғаныс министрлігінің Аэроғарыш комитеті жүзеге асырады.

Тараптар бір біріне осы Келісімнің 6, 7 және 10-баптарында аталған уәкілетті органдардың тағайындалғаны туралы дипломатиялық арналар бойынша хабарлайды.

14-бап

Осы Келісімнің ережелерін түсіндіру мен қолдануға қатысты дауларды Қазақстан Республикасы мен Ресей Федерациясының арасындағы ынтымақтастық жөніндегі мемлекетаралық комиссиясының "Байқоңыр" кешені жөніндегі кіші комиссиясы шешеді.

15-бап

Осы Келісім Тараптардың Қазақстан Республикасы мен Ресей Федерациясы қатысушы болып табылатын басқа да халықаралық шарттары бойынша міндеттемелеріне ықпал етпейді.

16-бап

Осы Келісімге Тараптардың өзара келісімі бойынша толықтырулар мен өзгерістер енгізілуі мүмкін, олар осы Келісімнің - ажырамас бөліктері болып табылатын жеке хаттамалармен ресімделеді.

17-бап

Осы Келісім қол қойылған күнінен бастап уақытша қолданылады және оның күшіне енуі үшін қажетті мемлекетішілік рәсімдерді Тараптардың орындалғаны туралы соңғы жазбаша хабарлама алынған күннен бастап күшіне енеді.

Осы Келісім 1994 жылғы 10 желтоқсандағы Қазақстан Республикасының Үкіметі мен Ресей Федерациясы Үкіметінің арасындағы "Байқоңыр" кешенін жалға алу шартының қолданылу мерзімі аяқталғанға дейін қолданылады.

Астана қаласында 1999 жылғы 18 қарашада әрқайсысы қазақ және орыс тілдерінде екі данада жасалды және де екі мәтіннің күші бірдей.

*ҚАЗАҚСТАН РЕСПУБЛИКАСЫНЫҢ
ҮКІМЕТІ ҮШІН*

РЕСЕЙ ФЕДЕРАЦИЯСЫНЫҢ

ҮКІМЕТІ ҮШІН